

Jean-Charles Adami, professore

"Ci vole à addattà si à i cambienti climatichi!"



Jean-Charles Adami ghjè professore di lingua è cultura corsa à u liceu Gioacante in Bastia. Dapoi u 2017, travaglia cù e so scole à un prugettu chì permetterà di ricensà tutte e vecchie sumente corse è pone le da fà ne un giardinu accessibile à tutti.

Avite purtatu un prugettu cù zitelli di u liceu, dite ci ne di più...

Emu cuminciatu di settembre 2017 cù elevi di scole di seconda di u liceu Gioacante in Bastia una riflessione chì assaiava duie discipline : a lingua è cultura corsa è a storia è geografia. Emu travagliatu nant' à u patrimoniu è a biodiversità cultivata, cumminciendu cù a scuperta di a cipolla di Muta, una varietà abbastanza vecchia. Eppu un ghjornu emu invitatu à Catherine Peix chì hà travagliatu nant' à l'origine di a mela in un mondu è ci hà parlatu di Nikolai Vavilov, un cercadore chì avia giratu u mondu da creà una banca di sumente. Hè venutu in Corsica versu u principiu di u seculu vintu è ci sò e sumente corse in Saint Petersburg. Hè natu cusì l'assocu Custodii di u creatu da pudè fà volta ste sumente è fà un ortu Vavilov in Corsica.

In Bastia dunque ?

Iè, daretu à u Sacru Core custruitu in u 1820 da i Gesuiti. I lochi un'eranu più puliti dapoi un bellu pezzu. Sò piante nant' à 3000 m². U viscuvalu ci hà messu u locu à dispusizione da pudè pone è allucà e sumente. Si pò ancu imaginà un locu d'accogliu da fà cunferenze, per esempiu. A prima azzione hè stata quella di pulì u locu da rende lu accessibile è sicuru da pudè lu preparà pè pone è organizà

un spaziu cù lochi sfarenti di culture di sumente corse. In i lucali di u casale emu da fà un cunservatoriu di sumente. S'agisce di fà un ricensu di e sumente lucali da studià le è addattà le à e cundizione meteorulogichi di a Corsica.

Chi ghjè u scopu di stu prugettu ?

Di portà a nostra petra à e problematiche alimentari mundiale. Ci vole ch'è no possu addattà i nostri legumi attuali à i cambiamenti climatichi. Ci vole à riflette à a manera di luttà contr' à e malatie chì tomanu i legumi senza aghjustà cumpunenti chimichi. Vulimu sviluppà sulu-zione nove cù e nostre ricerche sperimentali da fà fronte à i problemi ambientali, climatichi è alimentari à vene. Sapimu ch'ellu ci hè u travagliu ma cù a vuluntà si pò fà tuttu !

Avite trovu partenarii ?

Iè. U centru di ricerche botaniche appiecate ci aiuta cù trè persone impiegate in u prugettu corsu : Stéphane Crozat chì ghjè etnobotanistu è direttore di u CRBA, Sabrina Novak, direttrice aggiunta è Charlotte Jubert, incaricata di pruggetti in ricerca è documentazione. Simu tutti pronti à cullaburà, ci mancano e mudalità di stu partenariatu. Dopu ci hè u Parcu naturale regionale di Corsica chì ci sustene è ci hà da dà une poche d'arregistramenti fatti da l'etnologu Paul Simonpoli in l'anni 80 chì sò infurmazione nant' à e varietà à prutege e persone à cuntattà. Una cullaburazione chì permetterà dinu di creà opere pedagogiche da asparte à u publicu largu. Simu belli lanciati è i sculari sò pronti à impegnà si !